


Sirijske vlasti blokirale Hamu

2 februar 2012 Izmijenjeno 18:01 CET

Stanovnici Hame kažu da su tenkovi blokirali glavne trgove kako bi spriječili proteste u znak sjećanja na krvoproliće



Slike ubijenih u masakru u Hami objavljene na Facebooku [AFP]

Postrojbe sirijske vojske zatvorile su u četvrtak trgove u gradu Hami, nakon što su stanovnici polili ulice crvenom bojom kako bi obilježili 30. godišnjicu pokolja koji je proveo otac predsjednika Bashara al-Assada tokom pobune protiv njegove vladavine. Aktivisti iz Hame su rekli da su vatrogasna vozila tokom noći isprala boju polivenu u spomen na krvoproliće počinjeno tokom napada na grad 1982. godine, središte pobune protiv Hafeza al-Assada, u kojem je poginulo oko 10.000 ljudi. "Oni žele ubiti sjećanje i ne žele da se toga sjećamo", rekao je jedan aktivist iz Hame, gdje su, kako kažu stanovnici, tenkovi blokirali glavne trgove kako bi spriječili proteste. "No mi to nećemo prihvatiti."

Moskva nastavlja isporuke oružja

Dok Assadovi protivnici ovim činom prkose njegovoj vlasti, zamjenik ministra odbrane Rusije Anatolij Antonov rekao je da će Moskva nastaviti isporučivati oružje Siriji, uz poštovanje međunarodnih normi.



Rusija prodaje Siriji avione Mig 29 [AFP]

"Sirija je zadovoljna vojno-tehničkom saradnjom s Rusijom. Do danas nema nikakvih ograničenja u našoj ponudi. Trebamo poštovati svoje obaveze i to činimo", kazao je on, prenosi RIA Novosti. Antonov je naglasio da su sve isporuke ruskog oružja u Siriju dokumentirane i da podliježu odgovarajućoj kontroli. On nije želio komentirati tvrdnje da su "demonstranti u Siriji ubijani iz ruskog oružja" i dodao da "ako su automati kalašnjikov korišteni ili se koriste u tu svrhu, onda je riječ o falsificiranom oružju".

Najveći uvoznik

Sirija je najveći uvoznik ruskog oružja u regionu, a dvije zemlje su ove godine potpisale ugovor o isporuci 36 školsko-borbenih aviona tipa Jak-130, čija će isporuka Damasku biti obavljena odmah nakon uplate avansa, što je ocijenjeno kao jasan znak povjerenja Moskve u opstanak sirijskog predsjednika na vlasti. Sirija i Rusija potpisale su i ugovore o isporuci aviona lovaca Mig 29 i sistema protivzračne odbrane tipa Buk M2E.

U Siriji već deset mjeseci traje oružani sukob vladinih snaga sigurnosti i grupa protivnika Assada u kojem je, prema podacima Ujedinjenih naroda (UN), poginulo više od 5.400 ljudi.

Moskva je odbacila nacrt rezolucije iza kojeg su stali Arapska liga, Washington i Pariz.

Rusija je upozorila da će uložiti veto na bilo kakvu rezoluciju o Siriji koju ocijeni neprihvatljivom, jasno rekavši da želi spriječiti intervenciju poput one u Libiji zbog Assadova 11-mjesečnog obračuna s demonstrantima i naoružanim pobunjenicima. Moskva je odbacila nacrt rezolucije iza kojeg su stali Arapska liga (AL), Washington i Pariz i koji traži da Assad prepusti vlast svom zamjeniku te traži da se iz bilo kakvih nacrta isključi intervencija.

Izvor: Al Jazeera